

〔清〕赵烈文撰

能静居日记

二



[清]赵烈文撰 廖承良标点整理

能静居日记

同治二年正月—同治七年十二月

二

岳麓书社·长沙

图书在版编目(CIP)数据

能静居日记/(清)赵烈文撰. —长沙:岳麓书社,2013.7

ISBN 978-7-5538-0002-8

I. 能... II. ①赵... III. ①赵烈文(1832~1894)

—日记 IV. K827=52

中国版本图书馆 CIP 数据核字(2012)第 264503 号

NENGJINGJU RIJI

能静居日记(全四册)

作者:[清]赵烈文

标点整理:廖承良

责任编辑:刘文(canghai5000@163.com)

责任校对:舒舍

特邀审稿:王杰成

装帧设计:胡颖

岳麓书社出版发行

地址:湖南省长沙市爱民路47号

电话:0731—88885616(邮购)

邮编:410006

网址:www.yueluhistory.com

2013年7月第1版第1次印刷

开本:960×640 1/16

印张:151.75

字数:2016千字

印数:1—2,500

ISBN 978-7-5538-0002-8/K·347

定价:450.00元

承印:长沙超峰印刷有限公司

如有印装质量问题,请与本社印务部联系

电话:0731—88884129

目 录

弁言	1
咸丰八年	3
咸丰九年	43
咸丰十年	102
咸丰十一年 ^①	259
同治元年	462
同治二年	617
同治三年	725
同治四年	853
同治五年	960
同治六年	1021
同治七年	1141
同治八年	1233
同治九年	1308
同治十年	1387
同治十一年	1470
同治十二年	1532
同治十三年	1587
光绪元年	1639
光绪二年	1733

① 正文作“咸丰十有一载”，目录及相应书眉以简明计，改为“咸丰十一年”，后面照此处理，不另注。

光绪三年	1787
光绪四年	1845
光绪五年	1906
光绪六年	1954
光绪七年	2006
光绪八年	2057
光绪九年	2112
光绪十年	2157
光绪十一年	2209
光绪十二年	2248
光绪十三年	2293
光绪十四年	2339
光绪十五年	2379

同治二年 太岁昭阳大渊献。

正月甲寅

朔旦戊申。晴，东南风。

晨起，拜天，拜先师孔子，拜释迦如来，普礼十方，拜先祖父母。敬占流年，得风火家人。

其繇曰：王命赤乌，与君徼期。征伐无道，诛其君傲。居止何忧。

辰刻，眉生来舟贺岁，并与余易帖，久谭别去。写眉生信，遣奴子送讳帖去。下午金力甫来贺岁。傍晚易舟邵伯划子。

接眉生来字，并以汤贞愍、戴文节醇士，名熙。便面属题。

金安清，号眉生，行二。浙江嘉善人，寄籍顺天。嘉庆丙子十一月二十九日生。

曾祖燠，妣氏闵。祖均，妣氏朱。考铨，妣氏章。兄庆澜。字小云。妻师氏。女七、子一。永感下。

初二日己酉^①。晴，顺风。

三十二岁降日。晨起拜天，拜先祖父母。写眉生复信，并题扇面。辰刻舟行，午到界沟三十里，申到白塔河二十七里。由此向南出中闸，三江营江口也。向西七里宜陵镇，

兄、卯空

子、應巳屏

財、水

父、表

財、丑

兄、卯空

① 原误作“乙卯”。

又十五里杨家涵子，又八里孔家涵子，又七里仙女庙，时已暮，泊舟。自泰州至仙女庙为盐河，自仙女庙至六闸为芒稻河。承平时运盐孔道也。接眉生来信。

题汤贞愍、戴文节画扇，为金眉生廉访作，即用其韵

大雅遗尺缣，故人心无已。珍盘罗珠金，焜耀孰可比。良诂翰墨贵，忠义重压纸。谁下巫贤招，庶几九原起。

初三日庚戌。晴，逆风。

晨发，十二里到湾头，芒稻河、运河交午处，六闸在其北约三十里，其上游从高宝各坝来。承平时盐舟或出六闸，或出湾头，前后更章不定。湾头出口处有二桥，曰壁虎桥，皆废，二船载大炮守北桥下。向西岸出口后南行十里，五台山大营有浮桥，又二里扬州城东关有浮桥，泊舟登陆，到城内少步。兵燹之后，只此一段市井，馀俱榛莽，遂不前行。未刻，舟复进十里，宝塔湾河形盘曲。又十里三汊河，南到瓜州，西到仪征，于此分路。昔盐舟赴仪所出江，此孔道也。有詹总戎启纶，字龙轩。营在此，约三千人，河下有浮桥，桥下泊舟。问仪征路，水浅已梗矣。

初四日辛亥。晴，顺风。

晨发，辰刻到瓜州，觅见原坐船。晤燕山，知子吕、衣谷先上盐舟，伊独在此见待，又邓姓仆小八亦来附行。各候缪芷汀、杨逸涛，又候萧达甫观察，萧不晤。系大香之子，在里中识之，伊托杨亦涛致意，余故往候。缪芷汀来。午刻舟行赴焦山，未刻到彼。候赵吟椒观察。同燕山、安林游定慧寺观周鼎，方丈旧有水晶二块，为贼取去。出寺登山，至观音崖，已于三年为贼毁。此山贼来往一月馀，寺宇仅此一处不存，馀俱岿然，不可谓非当代灵光矣。赵吟椒来答候，子吕甥自七号来，其舟尚未行，于瓜州知余至也。写吟椒信，谢其颺。

初五日壬子。晴，顺风，夜大风及雨。

早发焦山，由南岸行，望镇城甚近。贼于城北起外城，迤北而西，沿江包北固山在内，直绕至南门，长十馀里，官兵今守镇

城，恃此为固。辰刻到七号觅见子吕甥舟，即与其邻舟说妥趁行。午刻过船，船系钓钩子，中舱阁铺甚宽厂。申刻过子吕舟谭，不意中跌入水舱，底深六七尺，昏晕逾时，幸众友扶挈搓挪，久而得呻。服七厘散一撮，扶过舟卧，夜患腰痛，俯仰不得。尘劳苦恼，生死倏忽，沟壑之患，近在衽席，可畏也夫！是夜盐船移缚轮舟名哈喇，日本。左侧，子吕舟稍前相接。

初六日癸丑。晴。

已刻舟行，共系七舟。申刻行六十里，过仪征四眼沟，有李世忠水师把卡，查收盐厘。本舟所带盐船有二艘，所载系洋人贖本，未完盐厘，蓄意冲卡而过，李兵凡十馀艇，出港拦截，洋船开炮，李亦回击不中，倏忽已落后，竟不能追。例载洋人不准贩鹺，乃明目张胆为之，中国虚与立约，不如一废纸之用，可笑可喟。是日又行二十馀里，泊不知名。腰恙未瘳，力疾写家信交子吕，拟前途到金陵，予少留也。又字与子吕。

初七日甲寅。人日。晴。

五鼓即发，辰刻到栖霞，未刻过下关，七里洲、九洲州贼营、官营皆如故。酉刻到大胜关，近北岸泊。见有樯竿一簇，吾意味如粮台泊此，欲由此登岸，遂遣燕山、安林棹舟往探，二鼓尽返。苏州张子厚载福，去夏同艘甫到皖，荐之此处管厘。同来，知咏如已赴安省，其眷属坐舟亦在南岸，伊向与燕山相识，知余至，故来见迓。因与燕山、安林同下盐舟赴其卡，而属子吕、衣谷先行。三鼓到岸，子厚避舍相款。其卡地名西江口，紧对大胜关，与新开河通。新开河口在其下二十里。商船行新开河者，皆由此入口。

初八日乙卯。穀日。雨。

晨起，张子厚以炮船送吾到南岸，伊亦同行。咏如家眷船泊夹江内对面江心州，大约龙江关地也。晤咏如长子康来、字作山。三子序来、四子廩来，约吾下榻其舟。饭后到子厚总局内，识金陵马蔚堂。下午雇得安庆四空船，价甚廉，船甚美，名小满江红，晚饭后移至舟中。

初九日丙辰。晴。

已刻，偕燕山进营，统帅中军在安德门，距江口十六七里。自登岸抵彼，土堤一道，列营守之，以护粮运。午刻到营，进谒沅圃统帅，方有恙，约余便服至榻前，执手问讯，谭至良久。留饭后，借余洋人远镜，出营为瞭望之计。里人薛方亭炳炜，在营内管军装房。闻吾至，遣人在帅幕下相候，遂往候之。并约燕山来，同到营前门外看金陵城。其远镜甚佳，望见雨花台贼垒三座，相隔甚近，约五六里，营系砖墙，四面俱有三层碉楼，守御甚固。城上无旗帜、守兵，城内屋舍稠密，伪王府黄墙宽约三四里，大殿三重，高亭金顶葫芦在其后。忆戊午正月，吾在和帅大营，登钟山龙脖子，见其府内殿后有亭三，今止见一亭之顶，盖彼时从后侧旁看故全现，今从正面对看，屋高蔽其二也。又城内亭甚夥，悉是王府。更东北望，城外孝陵围墙，及和帅时所挖长濠，龙脖子上之东炮台，历历俱在。六年之内，两观贼庭，一从北望南，一从南望北，遥遥相向，贼阻兵不休，而吾游踪无厌，同一痴妄，可笑也。城西南隅一大树，吾妇家邓氏万竹园在其下，吾昔恒抚之，今枝干如故，劫中不坏，殆灵物矣。统帅全军约及二万人，今调去数千。四十馀营，每营分筑二垒，以壮声势，营外环以长濠。头敌最前处，与雨花台隔仅一里，各营多在高冈，故瞭望甚晰。傍晚，帅遣招晚饭。属其幕中沈慎哉丽文，通州人，在皖曾见之。相陪，并属为余设榻。饭后与帅谭至二鼓辞出。

录薛方亭语：

去秋闰八月十七日，伪忠逆率援贼六十万至营外，十九日进攻，环围八昼夜不收队，分作二层，轮次进攻。时我军病卧者十成之八，威力疾赴斗，寒热甫退者，辄匍伏而往，掷一火弹，放一枪以助威势，贼竟无如之何，遂收队。聚扑各营，倏东倏西，至如潮涌。又设地雷轰陷某隅濠墙，我军死止数十人，立时以米囊堵起，枪炮不及，以火弹纷纷掷下，一时用去四十担，贼反死千馀人，竟不得进。先是我军拣锐勇扎出濠外八营，贼悉力来争，炮下如雨，营中器物无一事得完，而伤人独少。九月初，统帅督

战至猛字营，为贼枪中腮颊，血流至足，犹巡墙不止，统帅之弟事恒司马，登炮台望贼，贼知之，装炮相向，左右曳使亟避，甫起立而椅破。如是苦战经五句，十月初五日，贼力竭而遁。

初十日丁巳。晴。

偕燕山谒帅，允留差委，并招同饭，仍属沈慎斋见陪。饭后候幕府彭次卿、椿年，长沙人。赵舜臣、煦，长沙人。冯咏阳、至沂。熊寅先、陈芷轩、麒勋，湘乡人。黄策生、廖崑源、沅州人。陈莘农、武昌人。袁潜溪、沈慎哉，爰文，通州人。又营务罗茂堂。麓森。晤赵、冯、熊、陈、廖、陈、袁、沈诸人。谒帅辞行，帅素不识弢甫，闻余言其家贫，致赉甚厚，可感特甚。出与燕山话别，偕访其友胡蔚堂，少坐遂行。午刻抵舟，刘作山世讲来，同到子厚局内。傍晚同访王雨轩，卫昌，广西人，银钱所李少山之帮办。王雨轩来答访。

十一日戊午。晴，逆风。

舟早发，数里到大胜关泊。下午，有调回扬州之都营兵勇共五营，去年来助剿援贼，兹调遣回扬。在此对渡，大掳民船，阑及官舫，来者三十余人，向余求借船，送之过江。余见岸上人几及千，不趁早许之，势必一涌而上，用强开放，且系到西江口有卡局炮船，住舟转稳，遂即应允。傍晚船到北岸，该局两炮艇哨官汤某、王某来见。写张子厚信，闻上游李世忠四坝厘卡常滋事，又江路难行，拟借伊炮艇护送到芜湖。十二日发交其下人。

记难民情形：

江南有沅帅纠合水师捐资给赈，凡采米数千石，受赈者妇孺十万人。先是每人三日一升，至是不给，改为三日五合。虽沾惠者众，而充腹不足。沿江野地，匍匐挑掘野菜草根佐食者，一望皆是。鸠形鹄面，鸟聚兽散，酸楚之状，目不忍视。而江北一带，俱属李世忠管辖，下至仪、六，上抵滁、和，环转数千里，一草一木皆有税取，民至水侧掘蒲根而食，犹夺其镰斲，以为私盗官物。其稍有资本趁墟赶集者，往往为其兵勇凭空讹索，所有一空。民生之艰，诚不啻在水火。嗟乎！李本一盗耳，少迟日月，亦更

化为盗耳，何足责！而袁甲三无识庸妄，养成其羽翼，官至帮办提督，众至数十万，地至千里，误国殃民，虽族诛不足以塞责，转得安然而去。以苗、李二大逆贻之后人，其肉岂足食哉！

十二日己未。晴，逆风。

风不甚大，本可曳纤，而上游信紧，自三山以上，南岸往往有贼，非有顺风赶站不可，故仍不行。接张子厚本日信，允以炮船护行。后以本卡有公事，又上游亦尚可行，遂谢之。

十三日庚申。晴，逆风，连日暖如二、三月时。

十四日辛酉。阴，夜雨，大顺风。

晨发，辰刻过四坝，李世忠卡在北岸，有炮船。照样查舱即行，尚未肆猖獗。已刻过乌江，江中流尸相属。有杨军门水营驻此。未刻到牛渚矶，风甚，舟物尽倒。余方食，倾跌，覆羹污衣。申刻过太平府，酉刻到西梁山，有吉字副后营驻守，有水师分帮，又金柱关分卡亦在此。在山下泊舟。是日，共行百三十馀里。本地居民憔悴甚，无房屋，俱居土穴，苫盖其上而已。

十五日壬戌。元宵。大风雨，严寒。

泊舟山湾，浪来磕舟几碎。闻离此十里白渡桥，即有贼营，和州尚为所据。

十六日癸亥。风雨如故，严寒。

十七日甲子。阴，下午微雨，顺风。

早发博望，辰过裕溪口，在江北岸，平地无山。江中有州，江南有山，四合山也。不知名。彭少司马水师全营在北岸口门，兼有陆师，以扼和、含之贼。水师分帮驻江中州，余拟到北岸候谒，而风利不得泊。午刻，到芜湖，去梁山四十里，裕溪二十里住舟。遣奴子问知吴都转竹庄在此，遂往候之。竹庄留饮盛设，并招刘彤阶大令来作陪，饮散已暮。营距吾舟数里，水湍甚，夜不可渡，竹庄固留我宿。见伊所绘地图，芜湖老城在水口南岸进口砖塔下，名宝塔湾，湘营守之。对岸团防营，竹庄所统，共三千馀人。其

水发源泾邑，即青弋江，并通湾沚、黄池、宁国、高淳、东坝诸处。金宝圩在邑东南，其地民团守十年，为宁国、太平、金陵诸富家大族所萃，于去腊中旬失陷，死掠无算。周围数百里内，去年皆有收，自贼至，尽弃盖藏而走，来芜地者，不下数十万，哀鸿遍野，莫可赈恤。现在贼营离此近者二三十里，据高阜可望见。

十八日乙丑。阴，顺风。

早饭后，别吴竹翁，下舟即发，晡过三山。此系繁昌县之三山，名上三山，金陵三山，名下三山。傍晚到白茅州，泊在江北岸江水环曲处，去芜湖四十里，三山十五里。过芜湖，见沿途居民景象少舒，有负升斗趁市者。

十九日丙寅。晴，顺风甚利。

早发，辰到繁昌旧县治三十里，在江南岸，聚落尚盛。有山甚高，不知名。已到荻港板子矶二十里，矶在江南，不与岸连，山后可行舟。有厘局设其内，舟艘鳞栉。过荻港，江流大湾曲，山色绕南岸，青黛千万。晡到丁家洲，仿佛十一龄时奉讳归，曾守风于此十日，风景恍然心目。因误以为铜陵县，其实非也。傍晚，乃至县治，距大通尚三十里，在港口泊舟。荻港到大通，向云一站，询之土人，则云至此已九十里，不得其实。以今日风势，约计水程殆六七十里不为多也。写竹庄信。二十一日发交安林。

二十日丁卯。雨，顺风。

昨夜铜陵民持龙灯来舟次旋舞，颇有平靖时景象。此邑遗黎，殆视下游少瘳矣。晨发三十里，辰刻到大通。路遇某军徙营，封民舟，蔽江而下，不遗一叶。军差紧急，涉水不能无船，而所至之处有大舟，非各营坐船，即有军务公干，万不能载兵，兵亦不能捉，其渔刀、柴艇满载不过十人，立而不能坐，既使遗民不安其业，将士亦太苦矣。愚意各军每营定制连夫□六七百人，试以人数计之，每一棚连夫十二人，夜卧得地宽七尺、长五尺便足。造中等船长三四丈、宽七八尺者，一舟可装五棚，上层卧人，下层载本人行李零物，一营有十馀舟，宽然有馀，其军需支应文案

公夫等类，自有营官坐船，不在此数。既扎营，即将此舟泊相近水次，酌留长夫守之，一旦移营，洗足上船，军便而民不扰，计造船之费，每舟二百金，一营三千金而已。油舱之费岁不过二三百金，营官皆能任之。或嫌太繁，则两营共一帮，或三四营共一帮，有调遣时通融济用更便。惟物成公器，无人认真照料，不如各归各营之妥耳。

大通在南岸，有小山连绵，山下河口，通青阳县四十里，对面江中一洲名荷叶洲，离岸不及二里，洲上近为盐艘所集，桅如密林。岸上民舍稠密，亦有瓦屋，为安省迩日最繁盛处矣，有厘局设此。因舟人有事，泊此竟日。

二十一日戊辰。阴雨，午后霁。逆风甚微。

遣安林赴芜湖。辰刻解维挽纤，至晡仅三十里，泊舟处名王家套。小河深曲，未知通何处，有炮船守之。

二十二日己巳。晴，风微。

晨发挽纤，至晡以为至枞阳矣，问之尚三十里。又行许时泊，约更十里，土人云新集港。

二十三日庚午。晴，风微，夜雨。

晨行，巳刻到枞阳夹口，在江北岸，镇市在口内尚十里。有山不甚近，平淡惬意，岸柳既稀，春滕尽绿，一望如在故乡罨画也。南岸沿江山亦小，一阜出水中，舟子曰，此太子矶。过枞阳得顺，行稍速。午刻，过李阳口，在南岸，申末泊舟魏家窝，离家二十里。

二十四日辛未。雨，逆风。

晨起督船夫冒雨行，巳刻，到安庆东门，即登岸到家。晤开生、孟辛、寄雨、衣谷及甥辈，方会食，入内见四姊及内子，内子有恙卧床，馀各无恙。未刻，谒帅久谭。闻去冬以县丞保叙，余申谢。帅言保优恐致人言，不得不从微末而起，庶不致人侧目，其肫肺见爱如此，可感非凡。余因陈鄙情素无仕宦之志，愿为大将军揖客。帅笑颌之。候谒方元徵表兄先生及表侄子可，皆不晤。

初来寓吾舍，昨移左近天宁寺。下午，元徵先生见过，于是睽隔十四年矣，谭至二鼓始去。是行往返凡百二十六日，四千二百馀里。

二十五日壬申。大风雨，严寒，夜有雪。

早饭后候莫善徵，其眷属已至，并见其侄仲武、其子科儿。候霍生不见，候子偲并晤其长子伯鬯。彝孙。候华若汀、徐雪村、李冰叔，皆晤之。候程尚斋、蒋莼顷、李眉生、钱子密、柯小泉、程伯蓐，伯蓐已返新安，柯、李、钱不在，晤程观察、蒋太守，并晤魏绍庭。方元翁来，善徵来，在此饭后乃去。

接六姊去年十月初一信，又槐亭闰八月十二信、十月初一信。又汪燕山（又）〔闰〕八月十三信。又邓季雨八月初五日信。又才叔十二月初五信，言已就粤抚黄莘农聘。又幼静某月某日信。又孝拱闰月十四信，又般仲同日信。又问渔八月十九信。又姚彦嘉十月十三信。又杨子劭九月二十九信，内轮船公事信二件。又眉生本月初七信二件，又抄稿一件。又子迎壬戌中秋日信，哀讣。

二十六日癸酉。薄阴。

饭后同开生、孟辛至元翁寓，元翁同二君谒相，吾留与子可侄谭。子可青年积学，考订《汉·地理志》，郡各绘一图，地名里至，爽若眉列，可敬可佩。汤诗林来候。元翁同开、孟来。霍生来答候。四姊设酒肴。命余缮上相国极言书，二十四日脱稿，二十七日面进。又盐务条陈九条。

上相国书：某谨言。

二十七日甲戌。晴。

晨起，趋府朝谒相国，进昨书。首条、三条，极以为当。次条言今诸帅已渐释嫌忌，所陈且可不必。盐务策吾临出时乃进之，未面鹭可否。又言明日出，至无为、芜湖、江宁察看情形，有撤师之意。吾亦力赞之。返寓，马慎甫来候。早饭后，善徵来，同开生、孟辛、善徵诣元翁处，同至市中茗，得漆合、磁杯皿数事。刘同民度来候，十年在木渎识之。

二十八日乙亥。晴。

莫偲翁答候。方元翁来。刘纯甫子迎族弟来候。陆章甫来候，未晤之。

接潘贻清宅仁，其祖竹虚先生，幼时受业。十月二十三日信，托寄金器三事、银十两至上海。

二十九日丙子。晴。

侯绩卿建勋，无锡人。来候，李眉生来答候。方元翁携子可来。霍生来，三鼓乃去。

读《淮南》说林训、人间训。^①

二月乙卯

朔日丁丑。晴。

家人以余久在外，许愿供佛祈福，于今早设斋礼谢诸佛菩萨。同孟辛、衣谷、季雨至元徵师寓久谭。下午捡点书籍。

初二日戊寅。晴。

朱春舫观察来候。方恒，抚州金溪人，与吾兄及我老相识。午刻祀路神，以远行归也。捡点藏画，以母舅彦闻先生隶书八幅归元徵师。

初三日己卯。晴。

写眉生信，初六日发交裘姓。写史贤希信。初四日发交善徵。春分合祀先祖。下午，延子偲、善徵、霍生、汤诗林、元徵师、子可、开孙、孟辛、季雨、衣谷饮，刘同民适来，遂共坐，二鼓始散。里人刘锡玉娘莹，湾沚司巡检。来候，未晤。

初四日庚辰。晴。

捡点藏帖。写咏如信，即日发交霍生。写燕山信。即日发附咏如。同开孙、孟辛、衣谷诣元徵师。

接阿哥正月十三信。又咏如去秋九月十八信。从上海转来。又陆

^① 以上《能静居日记》十六。

健甫十二月初五信。又族弟任卿十二月初八信。

初五日辛巳。晴，夜雨。

写欧阳晓岑信，寄洋带二条，洋员一个。即日发交孟辛。槐亭信，寄还小女茗生原聘银一（定）〔錠〕，金簪一支。六姊信，寄洋布一匹。即日发交孟辛。子迎信，附般仲与何子贞信。寄祭幛一悬。初八日发交孟辛。稚威信。即时发交孟辛。黄南坡信。即日发交孟辛。晡候善徵，送其行，将赴祁门也。

初六日壬午。薄阴，夜雨。

刘纯甫来，在此午饭。陆章甫来访。夜，善徵来。

读《淮南》修务训、泰族训，要略。如序传之旨。

全书博而不精，多而寡要。旨者老庄之绪余，驳者谗闻之委萃。以供文人取材美矣，闻道则吾未知。

初七日癸未。薄阴。

夜漏加戌，狂风自东北至，屋瓦皆飞。后得楚信，岳州鹿角地方覆舟千馀，死者数千。

晨同开生、孟辛往送善徵，至则行矣。元徵师、开生、孟舆甥为孟辛饯行，饮甚欢。

晋书列传四十：

应詹、明世忠义。甘卓、元世贰臣，欲讨王敦而复怀首鼠。邓骞、元世僚佐，宜附譙王承传。卞壺、成世忠节，死苏峻之乱。卞敦、怀世忠义，可于东海王越传附数语。刘超、成世忠节，死峻难。钟雅。成世忠节，死峻难。

列传四十一：

孙惠、惠世藩僚，宜长沙王冏^①传内附数语。熊远、元世议臣。王鉴、元世议臣。陈颢、元世议臣。高（嵩）〔崧〕。袁世议臣。

远诸启事俱有理致，非空疏泛泛之比。

远疏言选官用人不料实德，惟在白望，不求才干，若不明其黜陟以审能否，则此俗未可得而变化。按此切中晋时之弊，而后

① 当作“齐王冏”。

世往往蹈之。

鉴劝讨杜弢疏曰：议者以大举役重，人不可扰。鉴谓暂扰以制敌，愈于放敌而常扰也。按此实有远见，得不算之算。

初八日甲申。阴，大风，甚寒如冬。

有喉疾甚剧。下午，李冰叔、华若汀、徐雪村招饮，不赴。夜，季雨、衣谷为孟辛饯行，亦不能出。

列传四十二：

郭璞、明世忠节。葛洪。隐逸。

初九日乙酉。晴。

喉疾如故。元徵师来，霍生来。洪琴西、向伯常来候，以疾不晤。程尚斋来答候，以疾不晤。霍生招饮不赴。写仲敏信。交孟辛。

《平攘录》五卷。

明诸葛元声撰。记隆、万二朝讨伐之事。首卷，俺答叛服。次卷，都蛮。四川事，曾省吾平之，张江陵主其事，地在川贵之间兴文县等处。三卷，唃拜。故番将，立功至大官，因饷激变，据宁夏。四卷，日本。平秀吉攻朝鲜，中国救之。五卷，播州。土司杨应龙自唐末专土，至是叛，李化龙督刘綎等讨平之。地即贵州遵义府。

初十日丙戌。晴。

霍生、诗林来，是日孟辛欲行返湘，以风不果。

《续资治通鉴》卷一至七。宋太祖。

毕沅撰。徐氏本，就明薛、王二氏本增删，此本又从徐氏本而出。

十一日丁亥。晴，大风。

写曾沅圃方伯信，即日发交王芝圃。又吴竹庄廉使信。同发。

接眉生正月信。又熊宜斋正月十一信，言前寄银三十六两已到。又邓考亭壬戌腊月二十一信。

十二日戊子。晴，大风。

元翁乔梓来。孟辛饭后行，以胡刻《文选》一部、明拓《圭